

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 122. sjednici, održanoj dana 23.09.2021. godine, d o n o s i

ZAKLJUČAK

I.

Utvrđuje se Prijedlog Odluke o stavljanju van snage Odluke o korištenju sredstava prikupljenih od naknada za promjenu namjene poljoprivrednog zemljišta („Službene novine Zeničko-dobojskog kantona“, broj: 5/15).

II.

Prijedlog odluke iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

PREMIJER

Mirnes Bašić

Broj: 02-_____/21
Datum, 23.09.2021. godine
Zenica

DOSTAVLJENO:

1x Ministarstvo za poljoprivredu, šumarstvo i vodoprivredu,
1x Stručna služba Skupštine,
1x a/a.

PRIJEDLOG

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na sjednici održanoj dana _____.____.2021. godine, donosi

O D L U K U

o stavljanju van snage Odluke o korištenju sredstava prikupljenih od naknada za promjenu namjene poljoprivrednog zemljišta

Član 1.

(Predmet)

Stavlja se van snage Odluka o korištenju sredstava prikupljenih od naknada za promjenu namjene poljoprivrednog zemljišta („Službene novine Zeničko-dobojskog kantona“, broj: 5/15).

Član 2.

(Stupanje na snagu)

Odluka stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj:
Datum:
Zenica

PREDSJEDAVAJUĆI SKUPŠTINE

Ćazim Huskić

O b r a z l o ž e n j e

I USTAVNI OSNOV

Ustavni osnov za donošenje ove odluke je član 37. stav 1. tačka f) Ustava Zeničko-dobojskog kantona.

II ZAKONSKI OSNOV

Zakonski osnov za donošenje ove odluke je član 54. Zakona o poljoprivrednom zemljištu („Službene novine Federacije BiH“, broj: 52/09) i član 10. Pravilnika o uslovima i načinu korištenja sredstava ostvarenih od zamjene, zakupa i koncesije poljoprivrednog zemljišta u vlasništvu države („Službene novine Federacije BiH“, broj: 78/09).

III RAZLOZI ZA DONOŠENJE

Ured za reviziju institucija u Federaciji Bosne i Hercegovine u Izvještaju o finansijskoj reviziji Ministarstva za 2018. godinu broj: 01-02-07-14-2-2030-6/18 od 16.09.2019. godine dao je preporuku ovom Ministarstvu koja glasi: „Intenzivirati aktivnosti na efikasnijem utrošku namjenskih sredstava prema programima utroška i sačiniti adekvatnu analizu o postignutim efektima“, shodno Zakonu o izvršavanju Budžeta Kantona. Naime, iz Izvještaja o izvršenju Budžeta Zeničko-dobojskog kantona za 2018. godinu i Izvještaja o realizaciji Programa utroška sredstva za uređenje zemljišta za 2018. godinu, od planiranih 1.000.000,00KM potrošnja sredstava je bila 1,98% odnosno 19.839,00 KM, a u Izvještaju o realizaciji Programa utroška sredstva za uređenje zemljišta za 2019. godinu potrošnja sredstava je bila 5%, odnosno 50.561,00KM jer je članom 2. Odluke o korištenju sredstava prikupljenih od naknada za promjenu namjene poljoprivrednog zemljišta („Službene novine Zeničko-dobojskog kantona“, broj: 5/15), ograničen utrošak namjenskih sredstava isključivo na uređenje privatnog poljoprivrednog zemljišta namjenjenog primarnoj poljoprivrednoj proizvodnji.

Članom 54. Zakona o poljoprivrednom zemljištu („Službene novine Federacije BiH“, broj: 52/09), a u vezi sa članom 10. Pravilnika o uslovima i načinu korištenja sredstava ostvarenih od zamjene, zakupa i koncesije poljoprivrednog zemljišta u vlasništvu države („Službene novine Federacije BiH“, broj: 78/09) je propisano da je naplaćena naknada na osnovu promjene namjene poljoprivrednog zemljišta u nepoljoprivredne svrhe posebna vrsta prihoda budžeta kantona i vodi se na posebnom računu, a može se koristiti samo u sljedeće svrhe i to: 1. izradu osnova, programa i projekata zaštite, korištenja i uređenja poljoprivrednog zemljišta; 2. provođenje mjera zaštite, korištenja i uređenja poljoprivrednog zemljišta i za inundaciona područja; 3. uspostavu informacionog sistema za zemljište; 4. zemljišni monitoring; 5. izradu karte upotrebne vrijednosti zemljišta; 6. izradu projekta višenamjenskog vrednovanja; 7. realizaciju poslova utvrđenih Strategijom i Programom gospodarenja; 8. dekontaminaciju zemljišta i podizanje zaštitnih pojaseva u neposrednoj blizini putnih komunikacija.

Imajući u vidu navedeno, ovo Ministarstvo predlaže stavljanje van snage postojeće Odluke jer se na taj način omogućava ovom Ministarstvu da prikupljena sredstva od promjene namjene poljoprivrednog zemljišta u nepoljoprivredne svrhe troši efikasnije, a sve u skladu sa članom 54. Zakona o poljoprivrednom zemljištu i članom 10. Pravilnika o uslovima i načinu korištenja sredstava ostvarenih od zamjene, zakupa i koncesije poljoprivrednog zemljišta u vlasništvu države.

IV OBRAZLOŽENJE PRAVNIH RJEŠENJA

Članom 1. predviđeno je stavljanje van snage Odluke o korištenju sredstava prikupljenih od naknada za promjenu namjene poljoprivrednog zemljišta („Službene novine Zeničko-dobojskog kantona“, broj: 5/15).

Članom 2. predviđeno je stupanje na snagu Odluke i objava u „Službenim novinama Zeničko-dobojskog kantona“.

V FINANSIJSKI EFEKTI

Donošenjem ove odluke neće iziskivati izdvajanje dodatnih finansijskih sredstava iz Budžeta Zeničko-dobojskog kantona odnosno donošenjem ove odluke dovest će do efikasnijeg utroška namjenskih sredstava.